

REGIONAL NEWS

HEADLINES:-

1. Akashvani Aizawl chuan vawiin hian kum 58 a tling.
2. Home Minister K Sapdangan tunhnaia Mizoram leh Assam ramri, Vairengte Sabual muala Assam Police ten kawng an laih chu tihtawp tir nghal a ni a ti.
3. Kerala-a Wayanad district-a leimin avanga thi zat chu mi 165 an tling tawh.
4. Union Health Ministry-a Secretary hlui Pi Preeti Sudan chu UPSC chairperson thar atan ruat a ni.

<><><>

Akashvani Aizawl chuan vawiin hian kum 58 a tling.

Akashvani Aizawl kum 58 tlin lawmna pual hian Akashvani Aizawl pisa Tuikhuahtlangah a lawmna hun buatsaih a ni a, Multipurpose Hall thar hawn a ni bawk.

Akashvani Aizawl Director leh Mizoram Cluster Head Pu DR Lalropuia chuan Multipurpose Hall thar a hawng a, Thusawiin Pu DR Lalropuia chuan All India Radio Aizawl chu rambuai kum, kum 1966 a din a nih thu leh khatih hunlai a curfew kar a Zoram mipuiten a thlawn a sorkar thuchhuak leh chanchin thar an hriatna atana thil tangkai tak leh mipui khawhar in awm tleina a nih thin thu sawiin, All India Radio Station atanga rimawi leh hun buatsaih hrang hrang tihchhuah thin chuan hlut a hlawh hle thin a ti a, Radio chu mipuite beng ti tlai ber tu pakhat leh a hunlai a thil thleng chanchin reng reng a nemnghehna tehna dik lo thei lova ngaih a nih thu a sawi.

Pu DR Lalropuia chuan kum 2020 kuma Covid 19 hripui len hunlai a radio-a thawktu ten mi dang ang bawkin covid hripui tuar mahsela primary channel Darkar 14 leh minute 35 leh FM channel Darkar 15 khaih lak lova nitin an tihchhuak thei chu lawmawm a tih thu leh Pathian venhimna liau liau an chan thu a sawi a, All India Radio Aizawl chu hmarchhak state-a station dang zingah pawh hmasawn ber pawl a nih thu sawiin, hmanraw tunlai ber ber hmanga hnathawh thin a nih thu a sawi bakah mipuite chhawr tangkai theih tura Radio hmanga programm chhawp chhuahte chu Mizoram khawpui Aizawl hriat rualin hmun kilkhawr atang pawh a an lo hriat theih phah thin thu leh sorkar laipui atanga hmalakna pawh radio kaltlang hian kuthnathawktu tam takin an chhawrin an hmang tangkai thin thu a sawi.

Vawiina hun hmanah hian Akashvani Aizawl pawimawhna leh hlawhtlinna hrang hrang ngaihthlak a ni a, zai leh thusawi pawimawh tak tak ngaihthlak a ni bawk.

Tun dinhmunah Akashvani Aizawl ah hian thawktu mi 170 an awm mek a, a ngheta thawk mi 50 leh a ngetlo a thawk mi 120 an thawk mek a ni.

<><><>

HOME MINISTER

Home Minister K Sapdangan tunhnaia Mizoram leh Assam ramri, Vairengte Sabual muala Assam Police ten kawng an laih chu tihtawp tir nghal a ni a ti.

He thu hi vawiina thuthar lakhawmtu thenkhat ten a pisaa an kawmna ah Home Minister hian sawiin, Kolasib Deputy Commissioner leh Cachar DC te an in be pawp nghal, a ti a, Pu K Sapdanga chuan kumin June thla-a ruahsur nasa avangin ramri a Assam Police-in camp an siam na border post kalkawng a min a, July thla tir atangin kawng min te chu an thianfai tih a sawi a, Home Minister chuan kalkawng min thenfai pah a kawng sial a awm thu chu a hmun ngeiah Vairengte Civil SDO leh SDPO ten kal chilhin an en nghal a, Kolasib DC a report an thehluk bawhzui a Cachar DC biak pawh a nih hnuah Assam Police te hmalakna hi tih tawp nghal a nih thu a sawi.

Home Minister chuan State pahnih Chief Minister-te lo inbiak tawhna angin thlathar mai ah hian ramri chungchang titi hona Aizawl ah neih a ni dawn tih sawiin, tun hnaia thil thleng chu DC leh DC indawrna level ah sawi fel mai a tawkrh ni a an hriat thu a sawi a, State pahnih te inbiakna tur chungchangah hian State pahnih Chief Minister ve ve ten an aiawh a a changtu Minister te inbiakna neih nise an tih angin, Mizoram lam atangin amah Home Minister hova Revenue Minister leh dept official dangte an tel tur thu leh sawiho tura chhawpchuah tur hrang hrang te chu dept official lamten an buatsaih tur thu a sawi bawkr.

Vawiin khan MZP Gen Hq hruaitute chuan, Assam leh Mizoram ramri, Assam-in hmathar an lakna hmun Vairengte Aitlang an tlawh a. Assam Police-in an camp panna kawng an laih avanga Mizoram chhunga kut thlakna thar nia lang chu a hmunah an en a ni. MZP Headquarters Kolasib, MZP Sub-Headquarters Bilkhawthlir leh MZP Sub-Headquarters Vairengte te'n an tawiawm bawkr a ni.

MZP te hian Vairengte Joint YMA leh Joint VC hruaitute nen Joint meeting neih puiin, he inkawm khawmna ah hian MZP hruaitute chuan; ralkhat atanga thlir ringawt lo a khawtlang hruaitute atang ngei a thil chiang zawkr hriat an tum vanga kal an ni tih an sawi a. Vairengte khawtlang hruaitute chuan an camp panna kawng motor tlan theihna tura blacktop emaw block pah a nih ve loh thu leh awlsam taka kal zung zung theih ala nilo chu chak zawka siam anih theih nan sorkar nawr turin MZP hruaitute an lo hrih a ni.

MZP hruaitute chuan, tun hnaia social media a video viral a, Assam Police in an camp panna kawng motor luh theih nana an laih leh Assam Police in a camp an rawn nei nia langte chu a hmun ngeiah kalin, an enfiah nghal a ni. Mizoram lamin a 3rd Battalion MAP awm mekna piah lama kawng an laih mek chu ruah a sur avanga an chawlh rih thu zawhfiah niin, MZP chuan Assam Police lam in a an kawng sial chu August ni 9 a Assam leh Mizoram sawrkar nen a inbiakna awm leh hma chu hnathawh hi ti tawp rih tura hmala turin thuneitute an ngen bawkr.

He hunah hian, MZP hruaitute hi Pu Victor Lalawmpuia, SDO leh Pu H. Lallunghnema, SDPO te'n an tawiawm a ni.

<><><>

MP

Parliament Session kal lai mekah Pu K. Vanlalvena'n nimirn Union Budget sawihona hunah Mizoram chu North East state 8-te zingah Assam tih lohah chuan MORTH hnuai motor kawngpui siamna atana budget chang tam ber a ni a ti a, lawmthu a sawi nghal a ni.

Pu Vanlalvena'n House a hrilh danin Ministry of Road Transport and Highway chuan Mizoram tan cheng vaibelchhe 16,606 a dah a, Mizoram chu tlangram a nih avangin inkalpawh nan rail kawngte, lawng kawngte aiin Motor kawngpui tha chu mamawh ber a nih thu a sawi a. Hemi atana Central sawrkara Ministry of Road Transport and Highway-in Mizoram hmun hrang hranga Two Lane Road an siam mek te, Aizawl by-pass road siamna turte, Silchar to Aizawl Four-Lane road siamna tur te, Zorinpui to Lawngmasu National Highway atana puan thar te, Saitual to Tuivai kawng te, Lunglei to Tlabung kawng atana budget-a cheng vaibelchhe 16,606 dah a ni chu lawmawm a tih thu a sawi.

Tun hmaa darkar 14 chung tlan thinna Aizawl leh Tuipang inkar chu tunah chuan darkar 8 a thlen theih tawh thu te, darkar 10 hman thinna Aizawl to Champhai pawh darkar 5 ah thlen theih tawh thute sawi chhuakin; hei hi Mizoram tana hmasawna ropui tak a nih thu a sawi bawk a ni.

<><><>

MNF PRESS CONF

MNF Party chuan ZPM Sorkar chu uchuak taka mahni leh party mite vulh chung a Zoram mipuite hrek mektu ah an puh.

Vawiina Aizawl Press Club-a thuthar thehdar tute hmaah MNF Media & Publicity hruaitute chuan ZPM sorkar demna thu hi sawiin, ZPM Sorkar chu thla sarih chung an sorkar hnuah inrenchem leh sorkar sawnghet zawnga hmalak intiam chung si a, an intiam lo ang hlira an kal avangin Zoram mipuite an vanduai hle hle a ni an ti a.

MNF Media & Publicity hruaitute chuan ZPM sorkar chu an party mi te Mizoram sorkar a dinhmun pawimawh hrang hranga tul lo taka hna chelh tirah puhin Mizoram sorkarin a hlawh a pek thenkhatte hlawh pawh nasa taka an pun thu an sawi a, MLA mahni in a chengte chauhvinn an dawn thin house furnishing pawh MLA zawng zawngten an MLA term kum khatnaah nuai 2, kum dang zelah sing 5 an dawn tawh dawn thu te, MLA te tan housing loan pawh cheng nuai 20 atangin cheng nuai 30-a an tihpun tur thu an sawi a, MLA te lirthei leina loan tihtawp tak pawh ZPM sorkar chuan an tihpun thar leh bakah a hma lama nuai 4 ni thin chu nuai 15-a an tihpun thu an sawi.

MNF Media & Publicity hruaitute chuan MLA fund chu nuai 150 atangin nuai 200 a tihpun a nih thu an sawi bawk a, MLA PA te hlawh pawh ZPM Sorkar chuan Rs 20,000/- atangin Rs 35,000/- ah an tipung a, AMC a Mayor hlawh chu Rs 31,000/- atanga Rs 65,000/- a tihpun a nih thu leh Lunglei Municipal corporation Chairman hlawh pawh cheng 27,500/- atanga cheng 62,000/- a tihpun thu sawiin sorkar tharin suma sen belhna tur a siam zawng zawngte chu kum nga chhunga cheng nuai 13,415.84 a nih tur thu an sawi.

<><><>

KERALA LANDSLIDE

Kerala-a Wayanad district-a leimin avanga thi zat chu mi 165 an tling tawh a. Armed Forces, NDRF leh State force lamin chak takin chhanchhuah hna an thawk a. Vawiin thlengin mi 1000 chuang an chhanchhuak tawh a ni.

Akashvani Correspondent sawidanin Churalmala leh Mundakai te chu leimin tuar nasa an ni a. Hliam tuar mi 186 te chu damdawiinah enkawl an ni a. Mi 3000 chuang chhawmdawlina camp ah an awm a. Chief Minister Pinarayi Vijayan chuan vawiin khan high-level meeting koin chhiatna thlen dan chungchang an sawiho a ni.

<><><>

UPSC CHAIRMAN

Union Health Ministry-a Secretary hlui Pi Preeti Sudan chu UPSC chairperson thar atan ruat a ni. Pi Sudan-i hi kum 1983-batch IAS officer a ni a. President Draupadi Murmu chuan UPSC chairperson atana Pi Sudan-i ruatna hi a pawm a. Thla hmasaa a hun aia hmaa bang ta Dr. Manoj Soni a thlak dawn a ni.

<><><>

PARIS OLYMPIC

Paris Olympic ni nganaah India aiawhte inlan tur engemawzat an awm a. Boxing, Archery, Badminton leh silai kahah te an inlan dawn a. Tokyo Olympic-a bronze medal la tu Boxer Lovlina Borgohain chuan Norway boxer Sunniva Hofstad a hmachhawn dawn a ni.

Vawiin thlengin China chuan Gold medal 7 lain hma an hruai a. Japan leh France ten an dawt a. India chuan bronze medal pahnih la tawhin 35 naah an awm mek a ni.

<><><>

HAMAS POLITICAL HEAD KILLED

Hamas Political head Ismail Haniyeh chu Tehran-ah thah a ni. Iran Islamic Revolutionary Guard Corps (IRGC) te chuan Ismail Haniyeh thah thu hi puangin Iran khawpuia an chennaah amah vengtute nen thah an ni a. Iran President thar Masoud Pezeshkian lakluh inkhawma tel tura khawpuia a awm lai nia hriat a ni a. Haniyeh hian Hamas hotu pawimawh tak niin an aiawha inbiaknaah vawi tam tak a lo inlan tawh a ni.

<><><>